

HEADLINES (EVENING)

1. Zirtawpni zan kalta a Aizawl Bawngkawn venga a insualpui kaptu Rochhingpuia te chhungkua chuan an chenna veng YMA in an hriattir angin nizan khan an in luah an chhuahsan.
2. Home minister Pu K. Sapdanga chuan Mizoram Sorkar in Mizoram-Assam ramri-a a pawm chu kum 1875 August ni 20-a ‘Inner Line’ ti a vuah, Cachar district chhim lam ramri ti a a tarlan chin a ni, a ti.
3. Kumin thla sarih chhung (January atanga July) khan Mizoramah HIV hri kai mi 611 hmuhchhuah a ni.
4. PM Narendra Modi chuan, India ram chhunga zirlai thiam tak tak hna zawng mekten awlsam zawka hna an hmuh theihna atan digital platform ‘Pratiba Setu’ siam a nih thu a sawi.

<><><>

BAWNGKAWN SHOOTING

Zirtawpni zan kaltaa Aizawl Bawngkawn venga a insualpui kaptu Rochhingpuia te chhungkua chuan an chenna Bawngkawn veng YMA in an hriattir angin nizan khan an in luah an chhuahsan.

Bawngkawn YMA hruaitute chuan Akashvani zawhna chhangin Rochhingpuia te chhungkua hi nizan zanlai thleng an veng chhuahsan tura hun an pek angin nizan la la khan an riak chhuak nghal tih an sawi a. An bungrua erawh nizana an thiar chhuah zawh hman loh avangin vawiin khan an thiar zo a, an chenna thin in chabi pawh YMA in an kawh tawh thu an sawi a ni. Bawngkawn YMA hruaitute chuan Rochhingpuia’n a kah Lalhriatrenga Siakeng chu a dinhmun a ngaihtuahawm loha an hriat thu an sawi a, an kan hnuhnun ber, nimirah pawh ICU-a la awm chu ni mahse amah pawh a tawng peih thu an sawi bawh a ni.

<><><>

CAG - DISASTER

Tun assembly fur thutkhawm a chief minister Pu Lalduhoma'n a House dawhkana a dah Comptroller & Auditor General (CAG) audit report-ah chuan chhiatna thleng thei laka invenna lam buaipuitu state disaster management authority leh a hnuai a committee dangte hnathawh duhkawp lohna nasa tak tarlan a ni.

Nikum March thla tawpa Cyclone Remal a tleh avang leh a hnu zela ruah sur nasa avang mi 42 lai Mizorama an thih hnu, in pawh 5,938 lai a chhiat hnu, kuminah pawh fur ruahtui tla tam lutuk avanga mi 6 an thih a hmun 940 a leimin leh chhiatna dang dangin Mizoram pumah harsatna namen lo a siam lai-in CAG audit report chuan State Disaster Management Authority (SDMA), the State Advisory Committee (SAC) leh State Executive Committee (SEC) te chuan Disaster Management Act-in tihtur a tih angin thil an ti nep niin a sawi a.

CAG report chuan state authority hian hmasawwna hna thawh dawnin chhiatna thleng thei venna leh a lo thlen a chhiatna tihnep dan tur ruahmannate a en letsak ngai lova. Kum 2015 March ni 15-a Department Disaster Plan a kaihhraina siam chu SEC din a nih hnu kum 8 zetah tihchhuah a ni. SEC hian kum 2017-18 leh 2021-22 inkar chhung khan inhmukhawm a buatsaih ngai lova, chhiatna thleng thei laka ruahmanna siam tura rawtna fumfe siam thei dinhmuna a ding lo a ni.

Hei bakah hian SEC hian hmasawwna hna thawh dawna a him leh him loh tur National Building Code 2005 duhdan angin a duang ngai lova State Disaster Management Plan leh National Disaster Management Plan duhdan angin leimin duhna hmunte hunbi nei a endik a ni ngai hek lo. Aizawl Hunthar venga lei tawlhna hmun a leilungte chu endik a ni na-in hmun dang erawh chu hlamchhiah a nih thu CAG report hian a tarlang bawh a.

SDMA hian lirnghing, leimin, tuilian, thlichhe tleh leh ruah bawhaww sur a lo thlena chet lak dan tur Standard Operating Procedure (SOP) hrang a siam hek lova, Mizoramah leimin a tam em em chungin a vilna atan 'automated landslide monitoring system' a la ruahman hek lo.

Kum 2020-21 leh 2021-22 chhung khan medical leh police lam mite pualin mock drill a buatsaih ngai lova. Chhiatna lo thleng bika che tur State Disaster Response Force battalion din a la ni lova, police-te atangin helama hman tur training a pe ve chauh a ni. Hei bakah hian police zingah hmeichhiate training pek an la ni lova, National Disaster Response Fund (NDRF) sum hmanna-ah felhlel leh lei phal loh thil leite a awm baww niin CAG report chuan a tarlang baww a ni.

<><><>

BORDER

Home minister Pu K. Sapdanga chuan Mizoram Sorkar in Mizoram-Assam ramri-a a pawm chu Kum 1875 August ni 20-a ‘Inner Line’ ti a vuah, Cachar district chhim lam ramri ti a a tarlan chin a ni, a ti.

Tun hnai a Assembly-a MNF member Pu K. Laldawngliana zawhna ziaka chhangin Pu K. Sapdanga chuan Mizoram leh Assam ramri chingfel tur hian state pahnih te hi kum 1988 atang khan vawi 10 (sawm) chuang an lo inbe tawh a. Kum 2024 August ni 09 khan Mizoram Sorkar leh Assam Sorkar aiawh te chuan Mizoram-Assam ramri buai chungchang sawiho turin Aizawlah state pahnih minister ve ve an inbe leh tawh a. Hemi hnu kumin April ni 25 khan Mizoram Sorkar leh Assam Sorkar aiawh official-te chu Mizoram leh Assam ramri buai chungchang sawiho in Guwahati-ah an inbe leh a ni, a ti a. Ramri buai chingfel tura state pahnih aiawh official-te inbiak lehna tur hi Mizoramin a thlen leh tura ruahman a ni a. A hun leh ni erawh ruat a la nih loh thu home minister hian a sawi baww.

Pu K. Sapdanga chuan ramri buai chingfel tur hian State pahnihte hian inbiakna bakah lehkha hmanga document te indil tawn leh inpe tawn a hmalak reng a nih thu a sawi a. Hemi atan hian Mizoram sorkar chuan Study Team din-in Study Team te hian India ram hmun hrang hrang atangin Mizoram tanhmun ti chak turin document-te lakhawmin hma an la reng a ni, a ti.

Mizoram-Assam ramri a Mizoram Sorkarin kawng a laih te hi a tul dan azirin hman leh enkawl zui zel an nih thu sawiin, state 2 te'n thuchhuah intawm an lo siam tawh avangin tuna thil awmdan pangngai pela lo chet rem lohna thenkhat a awm a, chuvangin inremna kalh zawnga chet a rem loh avangin enkawl leh hman zui remchang lo te pawh a awm niin a sawi a ni.

<><><>

BIOMETRIC ENROLMENT

July thla tawp atanga Myanmar atanga Mizorama rawn raltlan mit-naute leh kut ze thla lak hna chu a kal chak thei lo hle a, thla khat chuang chhungin raltlan 33,300 chuang zinga 6,370 chauh an mit-naute leh kutze thla lak an la ni.

Home department hotute hnen atanga thu dawn danin biometric enrolment hi duh angin district hrang hrangah kalpui chak theih a ni lova, an harsatna tawh lian ber chu ‘Foreigners Identification Portal & Biometric Enrolment’ (FIP&BE) software hmanga hna an thawhna khawl hman chianguang lo leh internet signal tha taww lote a ni a. Hei hian an hna a tithuanawp nasa hle niin district hrang hrang official-te chuan an sawi a. Relief camp-a awmte a hlawma endik an awlsam rualin an fate hmun danga lehkha zira awm an lo awm ve baww avangin an biometric data lak kim a harsa an tih bakah chhungte leh thiante belte bakah mi in luaha awm hmun karkir tak taka awmte chu khawtlang hruaitute tanpuina an hmu chungin hun a duh hle niin an sawi baww.

Ministry of home affairs duhdana biometric enrolment chauh kalpui tura ngaih a nih lai-in biographic data pawh lak khawm nghal a ni a. Raltlan hming, nu leh pa, a lokalna khua, Myanmar a a awm lai leh Mizoramah enge a thawh tihte lak zel a ni. Tun hma khan mimal chanchin chhinchhiah hna hi kalpui chhuah vek a ni tawh a, temporary identity card pawh pek chhuah deuh vek an ni tawh chungin an dinhmun hi a danglam reng avangin mimal chanchin chhinchhiah hi thar thawh leh a nih thu home department hotute chuan an sawi a ni.

Myanmar raltlan bakah hian Bangladesh Chittagon Hill Tracts atanga raltlan hi mi 3,000 tling lo an awma ngaih a ni a. Lawngtlai district-ah Bangladesh raltlan 2,000

chuang an awm a, Thenzawl khawpui-ah 299 awmin Lunglei district-a Khawmawi khua-ah mi 63 an awm mek bawk a ni.

<><><>

HIV

Kumin thla sarìh chhung (January atanga July) khan Mizoramah HIV hri kai mi 611 hmuhchhuah a ni.

Integrated counselling & testing centre (ICTC) report danin kumin January leh July thla inkar chhung khan HIV hri kai 611 hmuhchhuah thar a awm a, hemi hun chhung vek hian HIV hrik pai mi 295 an thi. Kum 2020 atanga kumin July thla tawp thleng khan HIV hri kai mi 11,032 hmuhchhuah a ni a. Kum 2022-2023 tangka kum chhung kha HIV kai hmuhchhuah tam ber kum niin 2,388 hmuhchhuah a ni. Anti Retroviral Therapy (ART) Centre atanga report danin hemi hun chhung vek hian HIV hri kai mi 2,996 an thi a, kum 2023 kha HIV hri kai thih tam ber kum niin hri kai mi 632 an thi a, a hma kum, 2022 khan mi 562 thi-in nikum khan mi 561 an thi bawk a ni. ART Centre atang veka thu dawn danin tun dinhmunah hian HIV hri kai mi 19,837 an awm mek a. An zinga mi 18,694-te hian ART centre-ah ART enkawl na an dawng mek a, enkawl na dawng lo mi 1,143 an awm mek bawk. ART enkawl na dawng lo zingah hian mahni duhthlanna ngei a la duh lo, hmun danga pem bo, an chin chhui zui theih loh, damdawi ngeih loh avanga doctor-in enkawl na an chawlh lailawktir leh Pathiana damna chang ni a inhria a damdawi a inenkawl na duh lote an ni hlawm.

Tun dinhmuna HIV hri kai mekte hi Aizawl district-ah tam berin mi 11,128 an awm a, Champhai district-ah 1,725, Kolasib district-ah 1,502 leh Lunglei district-ah 1,324 te an awm a. Hnahthial district-ah HIV hri kai awm tlem berin mi 284 an awm a ni.

<><><>

CHAMPHAI ROAD

Champhai leh Aizawl inkar kawngpui National Highway No.06 nizana leiminin a hnawh pin chu vawiin khan lirthei te chi kaltlang theihin thenfai a ni. Champhai leh Aizawl inkar kawngpui National Highway No.06 hi Champhai atanga km 5 bawr vel, Chhungte khaw hnuaiah nizan atangin leiminin a hnawh tawh a. Vawiin khan lirthei te chi kaltlang theiha thenfai a ni nain lung leh lei tawlh a awm reng avangin khawl hmanga then hleihtheih a ni lo a. Vawiin tlai thleng khan company lamin khawl hmaning lirthei zawng zawng kal theiha siam turin hma an la la mek a ni.

Nizan khan National Highway No.06 bakah hian National Highway hêlna Chhungte khaw kawng, Champhai atanga Aizawl panna kawng hlui, Champhai atanga KM 5-6 bawra awm chu lirthei tlan theih lohin kawng a min bawk a. Champhai District SP chuan thuchhuah siamin kawng hlui zawk chu khar a nih thu a tarlang a ni.

<><><>

MINISTER

Rural Development & Administration Minister Prof. Lalnilawma chuan vawiin khan Tamil Nadu-a Mount Zion Educational Institutions buatsaih Fun Fair 2025-2026 a hmanpui.

Mi chanhaite tanpuina tur sumtuakna Fun Fair 2025-2026 hi Mount Zion Silver Jubilee School campus, Thenkarai, Thiruppathur, Tamil Nadu-ah buatsaih a ni a. He hun hmanpuitu Minister chuan midangte tana luang chhuak tura inzirtirna a taka an kalpui chu ropui a tih thu a sawi a. Midangte tana luan chhuah program an hman chuan zirlaite thinglungah nasa takin a tha zawngin ngawng a nei ngei dawn tih sawiin ti chhunzawm zel tura a duhsak thu a sawi a ni.

Mount Zion Educational Institutions hian Fun Fair hi kumtin an buatsaih thin a. Zirlaiten an thiam ang angin eitur te siamin mipuite lei theih turin an pho chhuak thin a. Heta an sum hmuh hi mi harsa leh chanhaite tan an pe thin a ni.

Mount Zion Educational Institutions hnuaiah hian College of Engineering and Technology, College of Nursing, International School te a awm a, zirlai 12,000 vel an nei mek a ni.

<><><>

MYANMAR REFUGEES

Home minister Pu K. Sapdanga chuan August ni 20 thleng khan Mizoramah Myanmar raltlan 33,329 an awm meka chhinchhiah niin a sawi.

He thu hi Assembly fur inkhawma rorellai ZPM MLA Pu VL Zaithanzama zawhna ziaka a chhanna-ah home minister hian a sawi a. Myanmar raitlan chhinchhiah hna (biometric enrolment) thawhna atan hian Central sorkar atangin a hranpa chuan sum hmuh a awm lo niin a sawi a. Raltlan chhinchhiah Mizorama District tinin an thawk tan tawh a. Chinchhiah hna zawh hun tur hi sawi theih a ni rih lo niin Pu K.

Sapdanga chuan a sawi. India leh Myanmar inkar ramri chungchang chu Central Sorkar thuneihna a nih thu a sawi a. Central Sorkar hian ramri hungna tur hian State Sorkar leh Border Guarding Force (Assam Rifles) bakah Border Roads Organization te nena inrawn tlangin kalpui dan turah himalak mek a nih thu a sawi bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

MAAN KI BAAT

Prime Minister Narendra Modi chuan, India ram chhunga zirlai thiam tak tak hna zawng mekten awlsam zawka hna an hmuh theihna atan digital platform ‘Pratiba Setu’ siam a nih thu a sawi. He thu hi Akashvani-a hun a hmanna, Maan Ki Baat-ah sawiin Prime Minister chuan zirlai hna zawng tamtak UPSC leh sorkar hna lak danga mark tlemte avang chauhva tling lote hmantlak an nihzia pholan na atan digital platform ‘Pratiba Setu’ chu buatsaih a nih thu a sawi a, Prime Minister chuan he digital platform-ah hian thalai lehkha thiam, hman tlak leh chhawr tlak tak takte data bank 10,000 chuang a awm thu leh, hemi kaltlang hian private company-te pawhin an hnuaia thawk tur an lak nual tawh thu te bakah, thalai tam takin hna an hmuh tawh thu a sawi bawk.

<><><>

MODI MEETS JINPING

Prime Minister Narendra Modi leh Chinese President Xi Jinping te chuan India leh China chu ram inthenawm, hmasawanna lam kawng zawh mek ve ve an nih thu an thuchhuah intawm neihah an tarlang.

He thu hi vawiina China ram chhung, Tianjin-a Shanghai Cooperation Organisation khawmpui neih a hun reilote an inkawmnaah ram pahnih hruaitute chuan sawi chhuakin, India leh China ram inan lohna chu thu buai hla buai a neih loh tha an tih ve ve thu an sawi a, hei bakah hian sumdawanna kawngah leh visa pekchhuah thu ah pawh ram pahnih hruaitu ve ve te hian, a hma ai a thuk lehzuala inpawh tha an tih thu an sawi tel bawk.

<><><>